

AVANTURIZAM Kad je Tuzlak opsjednut morskim pučinama

Senad Švraka puna tri mjeseca živio na pustom otoku Čagos u Indijskom okeanu

Na hrvatskom Jadranu jedva živu glavu izvukao • Više od deset godina živi u Francuskoj

More je uvijek privlačilo jednog Tuzlaka, koji je cijeli život čitao knjige o pomorskim putovanjima, sve dok se jednog dana i sam nije otisnuo sa kopna.

Drama na Jadranu

Senad Švraka je teorijom moreplovstva dobro „potkovao“. Međutim, u vrijeme kada se otisnuo na morske pučine, o jedrenju je malo toga iskustveno znao. Jedna od njegovih prvih samostalnih plovidbi mogla je, ujedno, biti i posljednja.

- Plovio sam sam Jadr-

anskim morem duž Dugog otoka, kada je nastalo nevrijeme i more je podiviljalo. Puhao je snažan vjetar, bio je mrkli mrak, a gotovo svaki val prijeto je da će i mene i brodicu razbiti o stijene. Ništa osim bijelih krijesta valova i zavjese kiše nisam vidio. Borba sa morem trajala je oko šest sati, bio sam iscrpljen, uplašen i pomišljao sam da ću, ako preživim, odmah prodati brod - priča nam Senad, kojeg je ljubav prema plovidbi „natjerala“ da dignu sidro i krene dalje čim je narednog dana na nebu ugle-



Na nenaseljenom otoku Čagos

dao sunce. Od tada je preplovio mnoga mora i posjetio brojne zemlje, a namjeravao je, kaže, postati prvi Bosanac koji je jedrilicom sam oplovio svijet.

Nije uspio, ali to ne smatra porazom, jer će, kaže, odmah poslije odmora u Tuzli nastaviti dalje.

Taj izazov me još čeka, ali do proljeća ću odmarati. Brod sam pro-

dao na otoku Majot u Indijskom okeanu, jer je njegovo održavanje skupno, ali nadam se da ovo nije kraj putovanja - kaže ovaj zaljubljenik u prirodu i more, koji je na nenaseljenom otoku Čagosu živio tri mjeseca.

Otok se nalazi u Indijskom okeanu, a prema njegovom mišljenju, nenaseljen je samo zato što nema prirodnih resursa i što se mora donijeti sva

hrana, osim ribe koje ima u izobilju.

- Ostao bih ja i duže da sam mogao, jer je to jedno fantastično mjesto. Vrijeme sam provodio u ribolovu, kupanju, istraživanju otoka i druženju sa drugima moreplovcima, jer iako je nenaseljen, otok nije pust. Tamo se zadržavaju jedrilice u prolazu i uvijek nekoga ima - otkriva Senad dok nam pokazuje fotografije sa putovanja.

Osim što košta, planiranje dužih putovanja može biti i vrlo komplicirano, a nikako se ne smiju zanemariti ni pripreme za eventualne krizne situacije.

- Brod mora nositi zalihe hrane i vode koje će u slučaju gubitka pogona (motor, jedra) ili drugog dužeg, nepredviđenog boravka na pučini spasiti posadu da ne umre od gladi i žeđi. Osnovne zalihe su brašno, riža, tjestenine i

konzerve - kaže Senad.

Kada smo ga pitali kojim dokumentima prelazi kopnene i vodene granice, kazao je da posjeduje francuski pasoš, koji mu omogućava nesmetano kretanje.

Pisanje knjige

- Ako bih u razgovoru spomenuo da sam iz Bosne, to je obično izazvalo radoznalost i zapitkivanja. Međutim, susretao sam i ljude koji nikad nisu čuli za našu zemlju i koji su me pitali gdje se ona nalazi, te da li ljudi u njoj govore engleskim jezikom - ističe možda jedini bh. istinski moreplovac Senad Švraka.

Otkriva nam da ima namjeru svoje doživljaje i avanture prenijeti na papir i ovih dana počinje pisati knjigu. Nada se da bi rukopis mogao biti gotov do proljeća.

A. ARNAUTOVIĆ

Snimatelj po zanimanju

Senad Švraka rođen je u Tuzli 1964. godine, gdje je pohađao Gimnaziju „Meša Selimović“, matematički smjer.

Za filmskog i TV snimatelja obrazovao se na Akademiji dramske umjetnosti u Zagrebu, a neko vrijeme radio je na televiziji.